



UKA 2015/163
7. oktober 2015
Peter Olsen

Siunnersuut uunga: Eqqumiitsuliornermik ingerlatsineq pillugu Inatsisartut inatsisaat nr. xx xx. xx 2015-meersoq:

Siunnersummut uunga; Eqqumiitsuliornermik ingerlatsineq pillugu Inatsisartut inatsisaat nr. xx xx. xx 2015-imeersumut matumuuna Inuit Ataqatigii imaattumik oqaaseqaateqassaavut.

Siullermik IA-miit ingerlaannaq oqaatigissavarput una oqaluuserisassaaq taamatut isikkoqartillugu naammassineqarsimannngitsutut isigigatsigu tamannalu tunngavigalugu suliareqqinnejarnissaai siunertaralugu ataatsimiisitaliamut ingerlateqqinnejarnissaai kissaatigaarpuit.

Taamatullu kissaateqarnitsinnut ilaatigut makku tunngavilersuutginiarpagut:

Naluneqanngitsutut upernaaq inatsisartut ataatsimiinnitsinni kulturimut inatsisiliortoqarnissaai siunertaralugu naalakkersuisut piareersaasiornissaannik kingusinnerpaamillu UPA 2016-mi saqqummiunneqartussamik naalakkersuisut peqquneqarnissaannik Inuit Ataqatigiinniit siunnersuuteqarnikuuvugut.

Nuannaarutigisatsinnillu siunnersuuterput inatsisartuninngaaniit akuersissutigineqarpoq, naak naalakkersuisut itigartinneqarnissaanik innersuussuteqartoqaraluartut. Naalakkersuisut eqqumiitsuliornermut inatsisiliornissaminnik pilersaaruteqarnertik, taassumalu UKA 2015-mi saqqummiunneqartussaanera tunngavilersuutigalugu.

Kisianni..., naatsumik oqaatigalugu inatsisartuninngaaniit naalakkersuisut kissaataat itigartinneqarpoq, uagullu siunnersuuterput inatsisartuninngaaniit akuersissutigineqarluni.

Taamaattumik uuma suliap saqqummiunneqarnera pillugu Nuannaassanerlunga? Nuannaassannginnerlungaluunniit? Tupaallassanerlunga? Tupaallassannginnerlungaluunniit naluleqqagiga

Tassami illuatungaatigut saqqummiussaq una soqtiginarpoq pissanganarlunilu, kisianni aamma aappaatigut eqqarsarnarluni; naalakkersuisut inatsisartut suliakkissimasaannik avaqqutsinerunnginnerluni?

Naalakkersuisut una suliaq saqqummiuppaat, uffalu tamanna inatsisartunit itigartinneqarnikuusoq. Inatsisartut aaliangiunnikuuaat eqqumiitsuliornermut tunngasoq kulturimut inatsisissamut ilanngullugu suliarineqassasoq, UPA 2016-milu ataatsimoortillugit saqqummiunneqassasut.

Naatsumik oqaatigalugu; taamanikkut siunnersutiginiakkama qulequassaata suliariinarnerani, kultureqarnermut immikkoortortaqarfitsinni atorfilitavut peqatigilluinnarlugit suliariinkuuarpuit. Eqqartorsimavarput qulequassaq sorliussanersoq; eqqumiitsuliornermut inatsimmik taaguuteqassanersoq imaluunniit kulturimut inatsimmik taaguuteqassanersoq.

Suliaq naammassimmat qulequassaq toqqarneqartussaq tassaalerpoq "Kulturimut inatsit" Qulequuttap taassuma toqqarneqarneranut tunngavilersuutaasut pingarnerit ilagalugu; taaguutip kulturip aammalui

oqaatsip kulturip imarisamigut – isumaqarnermigullu taaguummut, oqaatsimullu eqqumiitsuliornermut inatsimmut sanilliullugu anginerungaatsiarnera imaqarnerunera, pingarnerunerusutullu inissismanera pissutigalugu

Eqqumiitsuliornermut tunngasortaa, kulturimut inatsisisap ataaniissinnaasoq aamma aaliangiunneqarluni.

Sorleq siulliua? Kukkukooq mannilluunniit?

Sorleq siulliua? Kukkukooq mannilluunniit?

Ungalu suliamut tunngatillugu sorleq kukkukuujua sorlerlu manniua? Kulturi imaluunniit eqqumiitsuliorneq?

Tamannali pillugu maani assortutissanngilavut anneruniutissanngilavullu.

Oqaatiginiarali uaniiginnarpoq sorliit sulisitsisuuppat? Inatsisartut imaluunniit naalakkersuisut? Sorliit inatsiliortuuppat soorliillu atuutsitsisussaappat? Inatsisiliortut suliakkiussaat aaliangigaallu naalakkersuisut malissannginneramikkit?

Eqqumiitsuliornermut inatsisisap pisariaqartinneqarnera assortuussutigissanngilarput, pisariaqarpoq pingaaruteqarporlu; Saqqummiuneqartoq assortugassaannaanngilaq, ajunngitsorpassuarnik soqtiginartorpassuarnillu imaqarami.

Kisianniliuna....;

Kulturimut inatsisisap imassarpassui eqqumiitsuliornermut inatsisisap iluanut ilanngunneqarsimasut takuneqarsinnaavoq. Tamatumalu aamma kingunerisimalerpaa apeqqutissarpassuaqarlersimanitsinnut.

Inatsisartut aaliangersagaat taava qanoq pineqarniarpa? Suliaq saqqummiuuneqartoq kulturimut inatsisiliassamut sunniuteqassava? Suliaq saqqummiunneqartoq Inatsisartut suliakkiussimasaraluannik avaqqutsinerunera?

Kulturimut inatsisisap naammassineratigut ernumassutigineqarsinnaannginnerpa eqqumiitsuliornermut inatsisisap uuma kalluarneqarsinnaanera? Imaluunniit killormut?

Sukkut kulturi aamma eqqumiitsuliorneq killilerneqarniarpat? Kultur aamma eqqumiitsuliorneq avinneqarlutik immikoortinneqarsinnaappat? Suna kulturiua sunalu eqqumiitsuliornerua? Kulturi eqqumiitsuliornerua? Imaluunniit eqqumiitsuliorneq kulturia?

Taamaattumik paaserusunnarsivoq, una massakkut inatsisissatut siunnersuut saqqummiunneqartoq inatsisartut suliakkiussannik avaqqutsinerunersoq imaluunniit kulturimut inatsisisap suliarineqarneranerut, ilussaatigut imarisaatigullu qanoq kalluaassanersoq sunniuteqassanersorlu.

Neriuppunga apeqqutit tamakku saqqummertut inatsisartunit minnerunngitsumillu naalakkersuisuninngaanniit akineqarsinnaajumaartut, eqqumaffigilluarneqarumaartut, upernaarlu aaliangiunneqarsimasoq puiorneqassanngitsoq.

Tusarniutigineqarnera:

Inatsisisaq pineqartoq aasaq manna tusarniutigineqarsimavoq, tusarniaanermilu susassaqartut arlalippassuit tusarniaaffigineqarsimapput. Tamanna ajunngilluinarpooq, naalakkersuisut nersualaagassaapput tusarniaaffigineqartut amerlassusaat ajoriinnagassaanngimmat;

EPI-ip tusarniaaffigineqarsimanera maluginiarparput tamannalu nuannaarutigaarput. EPI-mit nuannaarutigineqarluarpooq qilanaarineqarlunilu, kisianni aamma maluginiarparput uparuuateqarsimasut aammalu allangnuutissatut siunnersuuteqarsimagaluartut, soorlu oqaatsini imaattunut assingusunut “Tapiissoqar-sinnaavoq” taanna sinnaavoq, peqqusummik taarserneqassasoq soorlu imaattut oqaasertalimmik “Tapiisoqartassaaq”.-mik oqaasertalimmik taarserneqassasut siunnersuuteqarsimagaluarput.

Eqqumiitsuliornermut siunnersuisoqatigiliortoqarnissaa aammalu aningaasanik namminneq aquissinnaasaminnik akisussaaffilerneqarusukkaluarput, ajuusaarnaqisumilli kissaatit tamakku tamarmik naalakkersuisuninngaaniit akuerineqaratik tusaatisaannartut tiguneqarsimapput. Inuit Ataqatigiinnit ajuusaarnartutut tamanna isigaarput – akuersaaruminaatsippapullu EPI-kkut kissaataat ataasiinnarluunniit akuersaardeqarsimanngimmat.

Maluginiagassarlu ataaseq maluginiagassaavoq, tassalu:

Tusarniaaffigineqarsimasut ilaata tassalu Ilanniartitsisut Meeqcat Atuarfianni Kattuffiata – IMAK-ip oqaaseqaataa soqutiginarluinnarpooq immikkullu maluginiagassaalluni.

Naatsumik oqaatigalugu inatsisissatut siunnersuutaasup aaliangiiffigineqarnissaata upernaamut kinguartikkallarneqarnissaa IMAK-ip kissaatigaa, kulturimut aammalu timersornermut inatsisissanut ilanngullugu, tamaallilunilu ataatsikkut upernaakkut ataatsimiinnermi aatsaat saqqummiunneqarneqartussanngorlugit, inatsisartut aaliangiunniikuusimasaat naapertorlugu.

IMAK-kkormiut ilumoorput; inatsisartut aaliangigaat ataqqineqartariaqarpoq, unalu suliaq upernaamut kinguartinneqartariaqarpoq kulturimut timersornermullu inatsisissanut ilanngullugu, ataatsikkullu taakku tamarmik UPA 2016-mi saqqummiunneqarsinnaaniassammata.

Inuit Ataqatigiinnit taamatut tunngavilersuuteqarluta oqaluuserisassaq taamatut isikkoqartillugu naammassineqarsimanngitsutut isigigatsigu ataatsimiisitaliamut suliareqqitassanngorlugu ingerlateeqipparput.